

Consequenzas per il Grischun causa fugitivs?

Ura da dumondas dal cussegli grond

■ **(anr/fa) 13 deputadas e deputads han profità ier da la pussaivladad da far dumondas a la regenza. Pliras dumondas avevan da far cun la migraziun da requirents d'asil.** «Il Forum economic mundial FEM a Tavau è tant politicamain sco er economicamain in arranschament impurtant per tut la Svizra e surtut per il chantun Grischun», ha constatà *Lorenz Alig* (pld, Glion) e dumandà tge consequenzas ch'ils eveniments guerrils en il Proxim Orient e la migraziun per part nuncontrollada en Europa hajan per la segirezza al FEM 2016. «Conflicts guerrils en quella regiun devi gia avant il FEM 2015», ha respundì cusseglier guvernativ *Christian Rathgeb*.



Deputà Lorenz Alig (pld Rueun).

«Dispositiv da segirezza adattà permanentamain»

Rathgeb ha menziunà che la polizia chantunala s'haja preparada ils ultims onns per differentas situaziuns privlusas e per ristgs, ensemen cun autoritads naziunalas sco p. ex. il Servetsch d'infurmaziun federal. Quel analysescha tenor il cusseglier guvernativ permanentamain la situaziun e metta quellas infurmaziuns a disposiziun a la polizia chantunala. «Perquai na vegnan ad avair ils eveniments en Siria, Irac e Tirtgia, tenor il stadi actual, nagina relevanza pli gronda per la realisaziun dal FEM 2016.» Per la migraziun da requirents d'asil en Svizra è la ruta sur la Mar Mediterrana pli impurtanta che la ruta Tirtgia–Grezia–



Cusseglier guvernativ Christian Rathgeb.

Balcan. La situaziun difficila en Ungaria, Austria e Germania nun ha manà fin uss adaquella che daplirs requirents han svià quels pajais e vegnids en Svizra. Perquai na signifitgan tenor Christian Rathgeb «ils moviments da migraziun ord vista actuala nagin ulteriur privel per il FEM».

Nua na vegni betg tradi

Reto Cramer (pcd, Belfort) ha dumandà qualas consequenzas che l'uschenumnada «unda da fugitivs» haja per il Grischun: «Èsi da far quint ch'il chantun stoppia surprendre daplirs fugitivs?» Cusseglier guvernativ Rathgeb ha respundì che quai saja il cas perquai che la quota da renconu-

schientscha s'haja augmentada considerablamain e causa che la «prodecura Dublin» funcziunia mo pli limitadamain. «Perquai stoi vegnir dà suttetg a dapliras persunas, er en Grischun, per part en tschalers da protecziun, a Cuir, bainbaud temporarmain a Domat ed a partir dal schaner 2016 sin territori d'Arosa.» Pervi da las bleras dumondas d'asil sto il chantun Grischun tenor el chattar ulteriurs lieus per tals centers da transit. Sch'il chantun na pudessia betg dir ordavant nua ch'el prevesia da stgaffir da quels centers, ha dumandà Cramer. «Sche nus annunziassan quels lieus creschiss il squitsch sin las vischnancas, perquai na midain nus



Deputà Reto Cramer (pcd Alvra).

betg la pratica», ha ditg Christian Rathgeb. A la dumonda da Reto Cramer davart il dumber da fugitivs che derivan d' l'Eritrea ha'l respundì che las infurmaziuns areguard la situaziun en quel pajais sajan cuntradictorias. «Per la procedur d'asil è la confederaziun respunsabla, il chantun è mo organ executiv da las decisiuns federalas», ha declarà Rathgeb, ils chantuns na sajan damai betg responsabls per valitar la situaziun en Eritrea. «L problematica da la migraziun na dastgan ins betg reducir mo sin quel pajais, nus observain però attentivamain quella situaziun e vegnin, sch'igl è necessari, ad intervegnir tar la confederaziun.»